

**Канон честному и животворящему кресту**

**Тропарь, глас 1-и.**

Спаси Господи, люди Своя, и благослови достояние Своё, победы державе нашей на сопротивных даруй, и Своя сохраняя Крестом люди (дважды). **Слава, и ныне: той же.**

**Канон, глас 4-и. Песнь 1, ирмос.**

Отверзу уста моя, и наполнятся духа, и слово отрыгну Царице Матери, и явлюся светло торжествуя, и воспою радуясь, Той чудеса.

**Запев: Слава Господи, Кресту Твоему честному (поклон).**

**Кресте** всеильне, апостолом похвала, преподобным утверждение, и верным знамение, иерархом и мучеником слава, победа и утверждение всем хвалящим Тя.

**Запев. Кресте** всечестныи, четвероконечная сила, апостолом благолепие, и мучеником крепость, немощным здравие показася, мертвым воскресение, падающим воздвижение.

**Слава. Кресте**, ты ми сила буди, крепость и держава, избавитель и предрачник, на борющия мя, щит и хранитель, победа и утверждение мое, присно соблюдающи мя и покрывающи.

**И ныне, богородичен. На Кресте** Всенепорочная, Своего Сына яко узре, оружие скорбное утробу Твою растерза, и восклицала еси, рыдаючи в болезни, но абие прославила еси Креста силу.

**Катавасия. Сохрани** от бед рабы Своя, силою честнаго Креста Твоего, Милостиве, яко усердно к Тебе прибегаем, к Милостивому Избавителю и всех Владыце, Господу Иисусу (поклон).

Господи, помилуй (трижды, с поклонами).

**Песнь 3, ирмос.**

Твоя певцы Богородице, живыи нетления Источнице, лик Себе совокуплыпи, духовен утверди, и в Божественей Ти славе, венцем славы сподоби.

**Запев. Кресте**, преподобным оружие, обоюдный меч Христов, верным удобрение, болящим исцеление и заступление, и воздвижение умершим, всечестне.

**Запев. Кресте**, основание благочестия, бесом показася губитель, и церквам благолепие, нечестивым погибель, врагом посрамление в день судныи.

**Слава.** Кресте живоносныи, ты ми буди крепость, и победа и щит и стена нератуема, бесом отгнание, и помыслом погашение, и ума моего сохранение.

**И ныне, богородичен.** Распятие поносное, Дево Владычице, Твой Сын претерпел есть, и смерть неподобную; но вознесся, низверже противныя вражия силы, яко Безсмертен. **Катавасия.**

**Слава, и ныне. Седален, глас 8-и.** Проначерташе тайно древле временем, Исус Наввин креста образ, яко же рuce простре крестообразно, Спасе мой, и ста солнечное течение, дондеже враги погуби, противящияся Тебе, Богу; тем же зайде, на Кресте Тя зря; и доле державу смерти разорив, и ада связал есть.

### Песнь 4, ирмос.

Седяи во славе на престоле Божествене, на облаце легце, прииде Исус Пребожественый, от Пречистой Девы, и спасе вопиющия: слава Христе, силе Твоей.

**Запев.** Четвероконечныи сии мир, и яко триобюдныи меч, начала тмы сечеши. нами воображаем; Кресте, оружие великое Христово, и непобедимое победительство всеильное.

**Запев.** Твоя высота, живоносне Кресте, воздушнаго князя биет, и глубина вся бездны закаляет змия, широту паки воображает, низлагая мирскаго князя, кре постию Твоею.

**Слава.** Вознесся, сопривлекл еси падшиися, воздвигл еси естество земное престолу Божию, прославил еси, Кресте, высота великая, мирский мосте, душу мою от страстей глубины вознеси вскоре.

**И ныне, богородичен.** Крестообразно, Пречистая Отроковице Богородице, длани Свой распростерши, ко Иже на кресте воздвигену, и молитвы Дево, ныне принеси, за всех верно молящихся Тебе. **Катавасия.**

### Песнь 5, ирмос.

Удивишася всяческая о Божественей славе Твоей, Ты бо браконейскуемая Девице, прият во утробе над всеми сущаго Бога, и родила еси Безлетнаго Сына, всем воспевающим Тя, мир подающая.

**Запев.** Кресте, небесная лестнице святыни, степенем наставниче, Христова высота и слава еси. Божии образ, назнаменателен миру, невидимому же и видимому единочестна.

**Запев.** Кресте, образе неисписанныи силою, освящение водам, очищение воздуху, освящение и просвещение всякому, мужеству знамение, и Христов скипетро непреложный, противныя в землю попирая.

**Слава.** Кресте всесильне, злочестивыя низложи враги, ненавидящая и хулящая Тя безумно, языки попали, и угаси шатания их. О! Кресте всесвятый и христоносный, сохрани нас державою Своею.

**И ныне, богородичен.** Всех Царице Владычице, скипетром рождества Твоего разруши Девы востание, хулящим крестную силу. Дажь крепость и очищение, победу и помощь верным людем. Катавасия.

**Песнь 6, ирмос.**

Божественное се и всечестное совершающе празднество, богомудрени Божия Матере. Приидите, руками восплещем, от Нея Родьшагося верою славяще.

**Запев.** Крест всем воскресение, Крест падшим исправление, страстем умерщвление, плоти пригвождение. Крест душам слава, и свет верным.

**Запев.** Крест врагом губитель, Крест злочестивым язва и пленение, и верным держава; благочестивым хранитель, и бесом отгонитель.

**Слава.** Крест страстем пагуба, Крест помыслом отгнание, Крест сокрушение языческо искусительно, и духовом показася ловительство.

**И ныне, богородичен.** Крест воздвигется, и падают духов воздушных чинове, Крест снизходит, и нечестивии вси ужасаются, яко молнию видящи крестную силу. Катавасия.

**Слава, и ныне. Кондак, глас 4-и.** Вознесыися на Крест волею, тезоименитому ныне жителству Твоему. Щедроты Твоя даруй, Христе Боже. Возвесели силою Своею державу нашу, победы дая ей на сопостаты, пособие имущу Твое оружие, миру непобедимую победу.

**Икос.**

Иже до третияго небесе восхищен бысть в Рай, и глаголы услышав Божественныя неизреченныя, ихже не леть есть языки человеческими глаголати. Что к галатом пишет, яко рачителем Писанию, прочтосте и разуместе; мне рече, не буде хвалитися, токмо о Кресте Господни, на нем же страдав, уби страсти. Того убо и мы известно держимся, Креста Господня похвалы всех, есть бо нам спасение сие древо, оружие миру непобедимая победа.

**Уставщик возглашает: Прокимен, псалом Давыдов (глас 4-и):** Видеша вси концы земли, спасение Бога нашего.

**Певцы поют прокимен весь.**

**Уставщик — стих:** Воспойте Господеви песнь нову, яко дивна сотвори Господь.

**Певцы поют также весь прокимен.**

**Посем уставщик — прокимен до полу, а певцы поют вторую половину прокимна.**

**Затем, Иисова молитва. Певцы: Амѣнь.**

**Уставщик: Всяко дыханіе да хвалит Господа.**

**Певцы это повторяют пением.**

**Стих: Хвалите Бога во святых Его, хвалите Его во утвержении сил Его.**

**Певцы: Всяко дыхание да хвалит Господа (пением).**

**Уставщик еще: Всякое дыхание; певцы: да хвалит Господа. Посем певцы возвышенным гласом: Господи помилуй (трижды).**

**Уставщик: от Иоанна святого Евангелия чтение.**

**Певцы: Слава Тебе, Господи (поклон).**

**И, оградившись крестным знаменіем, слушаем со вниманіем благовестіе.**

**Евангелие от Иоанна, зачало 42 (от полу).**

**Рече Господь: Отче, прослави имя Твое. Прииде же глас с небес: и прославих, и паки прослаблю. Народ же стояи, слышав, глаголаху: гром бысть. Инии глаголаху: Ангел глагола Ему. Отвещая Исус и рече: не Мене ради глас сей бысть, но народа ради. Ныне суд есть миру сему, ныне князь мира сего изгнан будет вон. И аще аз вознесен буду от земли, вся привлеку к Себе. Се же глаголаше, назнаменуя, кою смертию хотяше умрети. Отвещая ему народ: мы слышахом от закона, яко Христос пребывает во веки. Како Ты глаголеши: вознеси́ся подобает Сыну Человеческому. Кто есть сей Сын Человеческий? Рече же им Исус: еще мало время свет в вас есть; ходите, дондеже свет имате, да тьма вас не имет. И ходя и во тьме, не весть, камо идет. Дондеже свет имате, веруйте во свет, да сынове Света будете.**

**Певцы: Слава Тебе, Господи (поклон).**

**И далее, пением: Слава Отцу и Сыну и Святому Духу: Отче, Слово и Дуже, Троице Святая, очисти множество согрешений наших.**

**И ныне и присно и во веки веком, амѣнь: молитв ради Богородицы, Милостиве очисти множество согрешений наших.**

**Помилуй мя Боже, по велицей милости Твоей, по многим щедротам Твоим, очисти беззакония моя, Боже Спасе мой.**

**И стихера (по 50-м псалме), глас 6-и.** Кресте Христов, християном упование,  
заблудным наставниче, тружальным тишина, во бранех победа,  
вселенней утверждение, недужным врачу, мертвым воскресение, помилуй нас.

**Песнь 7, ирмос.**

Непослужа твари богомудрости, паче Зиждителя, но огненное прещение  
мужески поправше, радовахуся поюще: препетыи, Иже отцем, Господь и Бог,  
благословен еси.

**Запев:** Пресвятая Троице, Боже наш, услыши молитву раб Своих, молящихся  
Тебе.

Нераздельную Троицу и неслиянную, естество единством богословим. Отца  
нерождена, и рождена Сына, и Святаго исходительнаго Божественнаго Духа  
песнями поюще: благословен Бог отец наших.

**Запев.** Незаходительными молниями Твоими трисоставне, наша озари умная  
очи, доброту Твою трисветне, пресущественную зрети, яже человеком  
неведомая, и неприступная ангелом.

**Слава.** Лучами света Твоего, падшую ми душу возведи от глубины, Благии  
Боже, препетыи и всеильныи, поплзшую от Света благодатнаго, и во тьму  
воглубльшуюся.

**И ныне, богородичен.** Крестообразно простерши рuce Чистая, к  
распростершему Своей рuce на древе крестнем, и вознесшу естество  
наше, и умертвившему вражебныя полки, молящи не престай. **Катавасия.**

**Песнь 8, ирмос.**

Отроки благочестивыя в пещи, рождество Богородичо спасло есть. Тогда убо  
образуемо, ныне же действуемо, вселенную всю воздвиге пети: Господа  
воспевайте дела, и превозносите Его во веки.

**Запев.** Высота Христовых страстей, и лук и оружие и меч, оружие  
непостыдное, и сила непобедимая, Христово подножие, и победительство на  
враги, знамение царствия, скипетре верных показася, Кресте победоносне.

**Запев.** Воздвигл еси наше падшее естество, Христом распеншимся, и  
совоставив. Высота божественная, глубина неизглаголанная, Христово ты еси  
знамение, Кресте пребогате, и широта безмерная, и знамение непостижимыя  
Троицы, Жизноносче.

**Слава.** Устами, душею же и сердцем Крест Господень лебызающе, приидите  
ныне вознесем вен и возвеличим, поклоняющися (поклон), рцем вкупе песнь  
пречистую вопиюще: радуйся великое богатство Кресте, церковное  
украшение.

**И ныне, богородичен.** Древо жизни и спасения, древо безмертия, древо разума, древо трилюбезно, нетленно и не изнуряемо, Крест трисоставный, честное древо, Троицы бо носит трисоставный образ. Катавасия.

**Песнь 9, ирмос.**

**Всяк** зѣмен да възграется, дѹхом просвещаем, да ликовствует же безплотных умов естество, почитая святое торжество Божия Матере, и да поет: радуйся Преблагенная, Богородице Чистая, присно Дево.

**Запев (поклон).** Кто слышана сотворит, яко же пишет, действия твоя, миролюбезны Кресте, силы и чудеса, и умершим востание, и мир весь совознесл еси, вознесиися к Богу, многожелаемыи.

**Запев.** Утвержение верным, Крест преблаженный, знамение и похвала, древо всеильное, Крест Христов великий и совершенный. Апостолом похвала, преподобным утвержение, и мучеником крепость и держава, царем победа и похвала.

**Слава.** Радуйся Кресте, образе неописанныи и многоименитыи, древо требогатное, страшно же и всеблаженно. Радуйся Кресте всесвятыи и всеильным, радуйся хранителю жизни нашей, Господень Кресте многопетыи.

**И ныне.** Кресте честный, хранитель души и телу буди ми, образом своим бесы низлагая, враги отгоняя, страсти упражняя, и благословение даруя ми, и жизнь и силу, содействием Святаго Духа, и честными Пречистыя мольбами. Катавасия.

**Задостойник:** Владычице, прими молитву раб Своих (стр. 92, поклон земной).

Трисвятое, и по Отче наш. **Молитва Исусова.** Тропарь: Спаси Господи, люди Своя. **Слава, и ныне, кондак:** Вознесиися на Крест волею. Господи помилуй (40, с поклонами). **Слава, и ныне.** Честнейшую херувим. **Слава, и ныне.** Господи помилуй (дважды) Господи благослови (с поклонами).

**Отпуст.** Господи, Исусе Христе, Сыне Божии, молитв ради Пречистыя Ти Матере, силою честнаго и животворящего Креста, и всех святых, помилуй и спаси нас, яко Благ и Человеколюбец. Аминь.

Господи, помилуй (трижды), и обычные исходные поклоны.